

MINISTERIO DE FACENDA

19571 *Real decreto 1270/2003, do 10 de outubro, polo que se aproba o Regulamento para a aplicación do réxime fiscal das entidades sen fins lucrativos e dos incentivos fiscais ó mecenado.* («BOE» 254, do 23-10-2003.)

A Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ó mecenado, estableceu o novo réxime fiscal para as entidades sen fins lucrativos que flexibiliza os requisitos para acollerse ós incentivos fiscais que establece e dota de seguridade xurídica suficiente a tales entidades no desenvolvemento das actividades que realizan en cumprimento dos fins de interese xeral que perseguen.

A lei establece tamén o conxunto de incentivos que son aplicables á actividade de mecenado realizada por particulares e empresas.

O desenvolvemento regulamentario levado a cabo por este real decreto permitirá a aplicación deses incentivos coa prontitude requirida pola propia lei, que previu o exercicio dunha opción para acollerse ó novo réxime fiscal especial por parte das entidades.

Este real decreto estrutúrase nun artigo, unha disposición derogatoria e catro disposicións derradeiras.

O artigo único aproba o Regulamento para a aplicación do réxime fiscal das entidades sen fins lucrativos e dos incentivos fiscais ó mecenado.

O regulamento consta de tres capítulos, con doce artigos, así como dunha disposición adicional e unha disposición transitoria.

O primeiro dos capítulos dedícase á regulación do procedemento previsto para a aplicación do réxime fiscal especial polas entidades sen fins lucrativos que cumpran os requisitos previstos na lei, dos requisitos da memoria económica que deben elaboralas ditas entidades e da acreditación para efectos da exclusión da obriga de reter ou ingresar á conta sobre as rendas que están exentas de tributación.

O segundo capítulo regula o procedemento para a xustificación dos donativos, doazóns e achegas deducibles polos suxeitos pasivos do imposto sobre sociedades e contribuíntes do imposto sobre a renda das persoas físicas e do imposto sobre a renda de non residentes, en particular, a declaración informativa que deben presentalas entidades sen fins lucrativos beneficiarias dos incentivos regulados no título III da Lei 49/2002, sobre as certificacións emitidas dos donativos e achegas percibidos.

E, finalmente, o terceiro capítulo refírese ó procedemento para a aplicación e o recoñecemento dos beneficios fiscais previstos nos programas de apoio a acontecementos de excepcional interese público.

Pola súa parte, a disposición adicional única introduce as precisións necesarias para a adecuación do réxime fiscal especial ás entidades relixiosas de acordo co establecido nos acordos internacionais e de cooperación correspondentes, así como na súa normativa de desenvolvemento, e a disposición transitoria establece un prazo especial para que poidan exercer a opción polo réxime especial aquelas entidades cun período impositivo iniciado con posterioridade á entrada en vigor da Lei 49/2002 e que finalizase antes de entrar en vigor o regulamento.

Por último, a disposición derogatoria única e as disposicións derradeiras deste real decreto regulan o seguinte:

A disposición derogatoria única contén a referencia á derogación de tódalas disposicións que se opoñan

ó establecido neste real decreto e, en particular, do Real decreto 765/1995 que desenvolvía a derogada Lei 30/1994, do 24 de novembro, de fundacións e de incentivos fiscais á participación privada en actividades de interese xeral.

A disposición derradeira primeira modifica os artigos 89, 90 e 95 do Regulamento do imposto sobre transmisións patrimoniais e actos xurídicos documentados, aprobado polo Real decreto 828/1995, do 29 de maio, para regula-la forma de acreditación das condicións que dan lugar á exención no dito imposto, así como o dereito á devolución en determinados supostos. E a disposición derradeira segunda modifica o artigo 66 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, co obxecto de delimitar con claridade o ámbito de aplicación da declaración informativa que deben presentalas entidades que perciban donativos regulados no artigo 55.3.b) da Lei 40/1998, do 9 de decembro, do imposto sobre a renda das persoas físicas e outras normas tributarias, e unifica-lo seu prazo de presentación co establecido, con carácter xeral, para as declaracións informativas anuais.

A disposición derradeira terceira introduce dúas modificacións no artigo 57 do Regulamento do imposto sobre sociedades, aprobado polo Real decreto 537/1997, do 14 de abril. En primeiro lugar, modifícase a alínea i).3.º, co obxecto de harmonizar plenamente a regulación no imposto sobre sociedades e no imposto sobre a renda das persoas físicas en materia de retencións e ingresos á conta respecto dos rendementos procedentes do arrendamento ou subarrendamento de inmobles urbanos. En segundo lugar, engádese unha alínea w), coa finalidade de que as rendas exentas recibidas polo Consorcio de Compensación de Seguros no exercicio das funcións que anteriormente lle correspondían á Comisión Liquidadora de Entidades Aseguradoras e que foron asumidas por aquel en virtude da Lei 44/2002, do 22 de novembro, de medidas de reforma do sistema financeiro, non estean sometidas a retención.

Por último, na disposición derradeira cuarta dispónse a entrada en vigor deste real decreto o día seguinte ó da súa publicación no Boletín Oficial del Estado.

Na súa virtude, por proposta do ministro de Facenda, coa aprobación previa da ministra de Administracións Públicas, de acordo co Consello de Estado e logo de deliberación do Consello de Ministros na súa reunión do día 10 de outubro de 2003,

DISPONGO:

Artigo único. *Aprobación do Regulamento para a aplicación do réxime fiscal das entidades sen fins lucrativos e dos incentivos fiscais ó mecenado.*

Apróbese o Regulamento para a aplicación do réxime fiscal das entidades sen fins lucrativos e dos incentivos fiscais ó mecenado, que se insire a continuación.

Disposición derogatoria única. *Derrogación normativa.*

Quedan derogadas tódalas disposicións que se opoñan ó establecido neste real decreto e, en particular, o Real decreto 765/1995, do 5 de maio, polo que se regulan determinadas cuestións do réxime de incentivos fiscais á participación privada en actividades de interese xeral.

Disposición derradeira primeira. *Modificación do Regulamento do imposto sobre transmisións patrimoniais e actos xurídicos documentados, aprobado polo Real decreto 828/1995, do 29 de maio.*

O Regulamento do imposto sobre transmisións patrimoniais e actos xurídicos documentados, aprobado polo

Real decreto 828/1995, do 29 de maio, modifícase nos seguintes termos:

Un. Modifícase o artigo 89, que quedará redactado da seguinte forma:

«Artigo 89. *Acreditación do dereito á exención.*

1. Para a acreditación do dereito á exención das entidades do artigo 45.I.A).b) do texto refundido da Lei do imposto sobre transmisións patrimoniais e actos xurídicos documentados, deberáselle xuntar á autoliquidación do imposto copia do certificado vixente no momento da realización do feito imponible regulado no artigo 4 do Regulamento para a aplicación do réxime fiscal das entidades sen fins lucrativos e dos incentivos fiscais ó mecenado, aprobado polo Real decreto 1270/2003, do 10 de outubro.

2. A Administración tributaria competente e as oficinas liquidadoras de distrito hipotecario poderán, mediante comprobación ou inspección, solicita-la documentación que xustifique o dereito á exención.»

Dous. Modifícase o artigo 90, que quedará redactado da seguinte forma:

«Artigo 90. *Acreditación do dereito á exención das entidades relixiosas.*

1. Para a acreditación do dereito á exención das entidades relixiosas, deberáselle xuntar á autoliquidación do imposto copia do certificado regulado no punto 1 da disposición adicional única do Regulamento para a aplicación do réxime fiscal das entidades sen fins lucrativos e dos incentivos fiscais ó mecenado, aprobado polo Real decreto 1270/2003, do 10 de outubro, cando se trate de entidades incluídas no punto 1 da disposición adicional novena da Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ó mecenado, ou copia do certificado vixente no momento da realización do feito imponible regulado no artigo 4 do citado regulamento, cando se trate de entidades previstas na disposición adicional oitava e no punto 2 da disposición adicional novena da dita lei.

2. A Administración tributaria competente e as oficinas liquidadoras de distrito hipotecario poderán, mediante comprobación ou inspección, solicita-la documentación que xustifique o dereito á exención.»

Tres. Engádese un punto 8 ó artigo 95, que quedará redactado da seguinte forma:

«8. Os suxeitos pasivos a que se refiren as alíneas b) e d) do artigo 45.I.A) do texto refundido da Lei do imposto que, tendo dereito á aplicación do réxime fiscal especial en relación con este imposto, satisfíxesen as débedas correspondentes a este, terán dereito á devolución das cantidades ingresadas.»

Disposición derradeira segunda. *Modificación do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro.*

O punto 2 do artigo 66 do Regulamento do imposto sobre a renda das persoas físicas, aprobado polo Real decreto 214/1999, do 5 de febreiro, queda redactado da seguinte maneira:

«2. As entidades beneficiarias de donativos a que se refire o artigo 55.3.b) da Lei do imposto

deberán remitir unha declaración informativa sobre os donativos recibidos durante cada ano natural, na que, ademais dos seus datos de identificación, farán consta-la seguinte información referida ós doadores:

- a) Nome e apelidos.
- b) Número de identificación fiscal.
- c) Importe do donativo.
- d) Indicación de se o donativo dá dereito á aplicación dalgunha das deducións aprobadas polas comunidades autónomas.

A presentación desta declaración informativa realizarase no mes de xaneiro de cada ano, en relación cos donativos percibidos no ano inmediato anterior.

Esta declaración informativa efectuarase na forma e no lugar que determine o ministro de Facenda, quen poderá establecer os supostos en que se deberá presentar en soporte directamente lexible por ordenador ou por medios telemáticos.»

Disposición derradeira terceira. *Modificación do Regulamento do imposto sobre sociedades, aprobado polo Real decreto 537/1997, do 14 de abril.*

O Regulamento do imposto sobre sociedades, aprobado polo Real decreto 537/1997, do 14 de abril, modifícase nos seguintes termos:

Un. Modifícase o ordinal 3.º da alínea i) do artigo 57, relativo a un dos supostos excepciónados da obriga de reter ou ingresar á conta respecto dos rendementos procedentes do arrendamento ou subarrendamento de bens inmobles urbanos, que quedará redactado da seguinte forma:

«3.º Cando a actividade do arrendador estea clasificada nalgún dos epígrafes do grupo 861 da sección primeira das tarifas do imposto sobre actividades económicas, aprobadas polo Real decreto lexislativo 1175/1990, do 28 de setembro, ou nalgún outro epígrafe que faculte para a actividade de arrendamento ou subarrendamento de bens inmobles urbanos, e aplicándolle ó valor catastral dos inmobles destinados ó arrendamento ou subarrendamento as regras para determina-la cota establecida nos epígrafes do citado grupo 861, non resultase cota cero.

Para estes efectos, o arrendador deberá acreditar fronte ó arrendatario o cumprimento do citado requisito, nos termos que estableza o ministro de Facenda.»

Dous. Con efectos a partir do 24 de novembro de 2002, engádese unha alínea w) ó artigo 57, no que se establecen excepcións á obriga de reter e de ingresar á conta, que quedará redactada da seguinte forma:

«w) As rendas derivadas do exercicio das funcións de liquidación de entidades aseguradoras e dos procesos concursais a que estas se encontren sometidas obtidas polo Consorcio de Compensación de Seguros, en virtude do disposto no parágrafo terceiro do punto 1 do artigo 24 de seu estatuto legal, contido no artigo cuarto da Lei 21/1990, do 19 de decembro, para adapta-lo dereito español á Directiva 88/357/CEE sobre liberdade de servizos en seguros distintos ó de vida e de actualización da lexislación de seguros privados.»

Disposición derradeira cuarta. *Entrada en vigor.*

Este real decreto entrará en vigor o día seguinte ó de súa publicación no Boletín Oficial del Estado.

Dado en Madrid, o 10 de outubro de 2003.

JUAN CARLOS R.

O ministro do Facenda,
CRISTÓBAL MONTORO ROMERO

REGULAMENTO PARA A APLICACIÓN DO RÉXIME FISCAL DAS ENTIDADES SEN FINS LUCRATIVOS E DOS INCENTIVOS FISCAIS Ó MECENADO

CAPÍTULO I

Procedemento para a aplicación do réxime fiscal especial das entidades sen fins lucrativos, memoria económica e acreditación do dereito á exclusión da obriga de reter e ingresar á conta

Artigo 1. *Opción pola aplicación do réxime fiscal especial das entidades sen fins lucrativos.*

1. Para a aplicación do réxime fiscal especial previsto no título II da Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ó mecenado, a entidade deberá comunicarlle á Administración tributaria a súa opción polo dito réxime a través da correspondente declaración censual.

2. O réxime fiscal especial aplicarase ó período impositivo que finalice con posterioridade á data de presentación da declaración censual en que se conteña a opción e ós sucesivos, mentres que a entidade non renuncie ó réxime.

A renuncia producirá efectos a partir do período impositivo que se inicie con posterioridade á súa presentación, que se deberá efectuar con polo menos un mes de antelación ó inicio daquel mediante a correspondente declaración censual.

3. En relación cos impostos que non teñen período impositivo, o réxime fiscal especial aplicaráselles ós feitos impositivos producidos durante os períodos impositivos a que se refire o primeiro parágrafo do punto anterior e a renuncia terá efectos respecto ós feitos impositivos producidos a partir do inicio do período impositivo a que se refire o segundo parágrafo do citado punto.

4. A aplicación do réxime especial quedará condicionada, para cada período impositivo, ó cumprimento, durante cada un deles, das condicións e requisitos previstos no artigo 3 da Lei 49/2002.

Artigo 2. *Aplicación do réxime fiscal especial para efectos dos tributos locais.*

1. Para efectos do disposto no punto 4 do artigo 15 da Lei 49/2002, as entidades sen fins lucrativos deberán comunicalo exercicio da opción regulada no artigo 1 deste regulamento.

2. En relación coa exención no imposto sobre bens inmobles e no imposto sobre o incremento de valor dos terreos de natureza urbana, a comunicación a que se refire o punto 1 deberase dirixir ó concello competente por razón da localización do ben inmueble de que se trate.

3. En relación coa exención no imposto sobre actividades económicas, a comunicación a que se refire o punto 1 entenderase realizada coa presentación da declaración censual a que se refire o artigo 1 deste regulamento.

4. No suposto de que as entidades sen fins lucrativos renuncien á aplicación do réxime fiscal especial, deberánlle comunicar tal circunstancia á entidade competente a que se refire o punto 2.

No caso do imposto sobre actividades económicas, a comunicación da renuncia entenderase realizada coa presentación da declaración censual a que se refire o parágrafo segundo do artigo 1.2 deste regulamento.

5. Os suxeitos pasivos que, tendo dereito á aplicación do réxime fiscal especial en relación cos tributos locais, satisfixesen as débedas correspondentes a estes terán dereito á devolución das cantidades ingresadas.

Artigo 3. *Memoria económica.*

1. A memoria económica que, en cumprimento do establecido na Lei 49/2002, deban elaboralas entidades sen fins lucrativos, conterá a seguinte información:

a) Identificación das rendas exentas e non exentas do imposto sobre sociedades sinalando o correspondente número e letra dos artigos 6 e 7 da Lei 49/2002 que ampare a exención con indicación dos ingresos e gastos de cada unha delas. Tamén se deberán indicar os cálculos e criterios utilizados para determinar a distribución dos gastos entre as distintas rendas obtidas pola entidade.

b) Identificación dos ingresos, gastos e investimentos correspondentes a cada proxecto ou actividade realizado pola entidade para o cumprimento dos seus fins estatutarios ou do seu obxecto. Os gastos de cada proxecto clasificaranse por categorías, tales como gastos de persoal, gastos por servizos exteriores ou compras de material.

c) Especificación e forma de cálculo das rendas e ingresos a que se refire o artigo 3.2.º da Lei 49/2002, así como descrición do destino ou da aplicación dado a estas.

d) Retribucións, en diñeiro ou en especie, satisfeitas pola entidade ós seus patróns, representantes ou membros do órgano de goberno, tanto en concepto de reembolso polos gastos que lles ocasionase o desempeño da súa función, como en concepto de remuneración polos servizos prestados á entidade distintos dos propios das súas funcións.

e) Porcentaxe de participación que posúa a entidade en sociedades mercantís, incluíndo a identificación da entidade, a súa denominación social e o seu número de identificación fiscal.

f) Retribucións percibidas polos administradores que representen a entidade nas sociedades mercantís en que participe, con indicación das cantidades que fosen obxecto de reintegro.

g) Convenios de colaboración empresarial en actividades de interese xeral subscritos pola entidade, identificando o colaborador que participe neles con indicación das cantidades recibidas.

h) Indicación das actividades prioritarias de mecenado que, se é o caso, desenvolva a entidade.

i) Indicación da previsión estatutaria relativa ó destino do patrimonio da entidade en caso de disolución e, no caso de que a disolución tivese lugar no exercicio, do destino dado ó dito patrimonio.

2. A memoria económica deberase presentar ante a Dependencia de Xestión Tributaria da Delegación da Axencia Estatal de Administración Tributaria do domicilio fiscal da entidade ou na Dependencia Rexional de Inspección ou Oficina Nacional de Inspección, se estivesen adscritas a estas, dentro do prazo de sete meses desde a data de peche do exercicio.

Non obstante, as entidades cun volume total de ingresos do período impositivo que non supere os 20.000 euros e non participen en sociedades mercantís, non estarán obrigadas á presentación da memoria económica, sen prexuízo da obriga destas entidades de elaboraren a dita memoria económica.

3. As entidades que, en virtude da súa normativa contable, estean obrigadas á elaboración anual da memoria poderán cumprilo disposto neste artigo mediante a inclusión na dita memoria da información a que se refire o punto 1.

Nestes casos, para os únicos efectos do cumprimento do disposto na Lei 49/2002 en relación coa memoria económica, o lugar e o prazo de presentación, así como os supostos de exclusión da obriga da súa presentación ante a Administración tributaria, serán os establecidos no punto 2.

Artigo 4. *Acreditación para efectos da exclusión da obriga de reter ou ingresar á conta respecto das rendas exentas percibidas polas entidades sen fins lucrativos.*

A acreditación das entidades sen fins de lucro para efectos da exclusión da obriga de reter ou ingresar á conta a que se refire o artigo 12 da Lei 49/2002 efectuarase mediante certificado expedido polo órgano competente da Axencia Estatal de Administración Tributaria, no que conste que a entidade lle comunicou á Administración tributaria a opción pola aplicación do réxime fiscal especial regulado no título II da mencionada lei e que non renunciou a este.

Este certificado fará consta-lo seu período de vixencia, que se estenderá desde a data da súa emisión ata a finalización do período impositivo en curso do solicitante.

Artigo 5. *Retribucións dos administradores nomeados en representación das entidades sen fins lucrativos.*

Para efectos da exclusión da obriga de reter a que se refire o último parágrafo do artigo 3.5.º da Lei 49/2002, corresponderalle ó pagador acreditar que as retribucións dos administradores foron percibidas pola entidade sen fins lucrativos á que estes representen.

CAPÍTULO II

Procedemento para a aplicación dos incentivos fiscais ó mecenado

Artigo 6. *Certificación e declaración informativa dos donativos, doazóns e achegas recibidas.*

1. A certificación a que se fai referencia no artigo 24 da Lei 49/2002 deberá conte-la seguinte información:

- a) O número de identificación fiscal e os datos de identificación persoal do doador e da entidade doadora.
- b) Mención expresa de que a entidade doadora se encontra incluída entre as entidades beneficiarias de mecenado de acordo co establecido na Lei 49/2002.
- c) Data e importe do donativo cando este sexa en diñeiro.
- d) Documento público ou outro documento auténtico que acredite a entrega do ben doado cando non se trate de donativos en diñeiro.
- e) Destino que a entidade donataria lle dará ó obxecto doado no cumprimento da súa finalidade específica.
- f) Mención expresa do carácter irrevogable da doazón, sen prexuízo do establecido nas normas imperativas civís que regulan a revogación de doazóns.

2. Para efectos do disposto no artigo 24.2 da Lei 49/2002, a entidade beneficiaria deberalle remitir á Administración tributaria unha declaración informativa sobre as certificacións emitidas dos donativos, doazóns e achegas deducibles percibidos durante cada ano natural, na que, ademais dos seus datos de identificación, deberá consta-la seguinte información referida ós doadores e achegadores:

- a) Nome e apelidos, razón ou denominación social.
- b) Número de identificación fiscal.

c) Importe do donativo ou achega. En caso de que estes sexan en especie, valoración do doado ou achegado.

d) Referencia a se o donativo ou a achega se perciben para as actividades prioritarias de mecenado que se sinalen por Lei de orzamentos xerais do Estado.

e) Información sobre as revogacións de donativos e achegas que, se é o caso, se producisen no ano natural.

f) Indicación de se o donativo ou achega dá dereito á aplicación dalgunha das deducións aprobadas polas comunidades autónomas.

A presentación desta declaración informativa realízase no mes de xaneiro de cada ano, en relación cos donativos percibidos no ano inmediato anterior.

Esta declaración informativa efectuarase na forma e no lugar que determine o ministro de Facenda, quen poderá establecer os supostos en que se deberá presentar en soporte directamente lexible por ordenador ou por medios telemáticos.

CAPÍTULO III

Procedemento para a aplicación dos beneficios fiscais previstos nos programas de apoio a acontecementos de excepcional interese público

Artigo 7. *Contido e ámbito de aplicación.*

1. A aplicación dos beneficios fiscais, para efectos do previsto no artigo 27 da Lei 49/2002, estará suxeita, en todo caso, á lei específica pola que se aprobe o programa de apoio ó acontecemento de excepcional interese público correspondente.

2. A aplicación dos beneficios fiscais requirirá o recoñecemento previo da Administración tributaria conforme o procedemento regulado neste capítulo.

3. A Administración tributaria poderá comproba-lo cumprimento dos requisitos necesarios para a aplicación dos beneficios fiscais a que se refire este capítulo e practicar, se é o caso, a regularización que resulte procedente.

Artigo 8. *Requisitos dos investimentos, gastos, actividades ou operacións con dereito a dedución ou bonificación.*

1. Para efectos da aplicación dos incentivos fiscais previstos nas alíneas a) e b) do punto primeiro do artigo 27.3 da Lei 49/2002, entenderase que os gastos e investimentos se enmarcan nos plans e programas de actividades establecidos polo consorcio ou polo órgano administrativo correspondente cando entrasen en funcionamento antes dos seis meses anteriores á data de finalización do acontecemento de excepcional interese público específico e obtivesen a correspondente certificación acreditativa a que se refire o artigo 10 deste regulamento.

2. No suposto de gastos de propaganda e publicidade de proxección plurianual, considerárase que os ditos gastos cumpren os requisitos sinalados na alínea c) do punto primeiro do artigo 27.3 da Lei 49/2002 cando obteñan a certificación acreditativa a que se refire o artigo 10 deste regulamento e reúnan as seguintes condicións:

a) Que consistan:

1.º Na produción e edición de material gráfico ou audiovisual de promoción ou información, consistente en folletos, carteis, guías, vídeos, soportes audiovisuais ou outros obxectos, sempre que sexan de distribución gratuíta e sirvan de soporte publicitario do acontecemento.

2.º Na instalación ou montaxe de pavillóns específicos, en feiras nacionais e internacionais, nos cales se promova turisticamente o acontecemento.

3.º Na realización de campañas de publicidade do acontecemento, tanto de carácter nacional como internacional.

4.º Na cesión polos medios de comunicación de espazos gratuítos para a inserción polo consorcio ou polo órgano administrativo correspondente de anuncios dedicados á promoción do acontecemento.

b) Que sirvan directamente para a promoción do acontecemento porque o seu contido favoreza a divulgación da súa celebración.

A base da deducción será o importe total do investimento realizado cando o contido do soporte publicitario se refira de modo esencial á divulgación da celebración do acontecemento. En caso contrario, a base da deducción será o 25 por cento do investimento realizado.

3. Para efectos da bonificación no imposto sobre actividades económicas prevista no punto cuarto do artigo 27.3 da Lei 49/2002, entenderase que as actividades de carácter artístico, cultural, científico ou deportivo que poden ser obxecto da bonificación son as comprendidas dentro da programación oficial do acontecemento que determinen a necesidade de causar alta e tributar polo epígrafe ou grupo correspondente das tarifas do imposto, de modo adicional e con independencia da tributación polo imposto sobre actividades económicas que correspondera ata ese momento á persoa ou entidade solicitante do beneficio fiscal.

4. Para efectos da bonificación nos impostos e taxas locais prevista no punto quinto do artigo 27.3 da Lei 49/2002, entenderase que a operación respecto á que se solicita o beneficio fiscal está relacionada exclusivamente co desenvolvemento do respectivo programa cando se refira unicamente a actos de promoción e desenvolvemento da programación oficial do acontecemento.

Entre os tributos a que se refire o mencionado punto non se entenderán comprendidos o imposto sobre bens inmobles, o imposto sobre vehículos de tracción mecánica e outros que non recaian sobre as operacións realizadas.

Artigo 9. *Procedemento para o recoñecemento dos beneficios fiscais pola Administración tributaria.*

1. O recoñecemento previo do dereito dos suxeitos pasivos á aplicación das deduccions previstas no imposto sobre sociedades, no imposto sobre a renda das persoas físicas e no imposto sobre a renda de non residentes será efectuado polo órgano competente da Axencia Estatal de Administración Tributaria, logo de solicitude do interesado.

A solicitude deberase presentar polo menos 45 días naturais antes do inicio do prazo regulamentario de declaración-liquidación correspondente ó período impositivo en que deba producir efectos o beneficio fiscal do que se solicita o recoñecemento. Á dita solicitude deberáselle xunta-la certificación expedida polo consorcio ou polo órgano administrativo correspondente que acredite que os gastos e investimentos con dereito a deducción a que a solicitude se refire se realizaron en cumprimento dos seus plans e programas de actividades.

O prazo máximo en que debe notificarse a resolución expresa do órgano competente neste procedemento será de 30 días naturais desde a data en que a solicitude tivese entrada no rexistro do dito órgano competente. O cómputo do dito prazo suspenderase cando sexa requirido o interesado para que complete a documentación presentada, polo tempo que medie entre a notificación do requirimento e a presentación da documentación requirida.

Transcorrido o prazo a que se refire o parágrafo anterior sen que o interesado recibise notificación administrativa acerca da súa solicitude, entenderase outorgado o recoñecemento.

2. Para a aplicación da bonificación na cota do imposto sobre transmisións patrimoniais e actos xurídicos documentados, os suxeitos pasivos uniranlle á declaración-liquidación do dito imposto a certificación expedida polo consorcio ou polo órgano administrativo correspondente en que conste o compromiso do solicitante de que os bens e dereitos adquiridos se destinarán directa e exclusivamente á realización de investimentos efectuados en cumprimento dos seus plans e programas de actividades, así como copia da solicitude formulada ante o órgano competente da Axencia Estatal de Administración Tributaria a que se refire o punto 1 deste artigo en relación co dito investimento.

Nos casos en que a dita solicitude aínda non fose presentada, farase constar esta circunstancia na documentación que se xunte á declaración-liquidación do imposto sobre transmisións patrimoniais e actos xurídicos documentados, debéndose achega-la copia da solicitude unha vez que fose presentada.

O dereito á bonificación na cota do imposto sobre transmisións patrimoniais e actos xurídicos documentados quedará condicionado, sen prexuízo das facultades de comprobación da Administración tributaria, ó recoñecemento pola Axencia Estatal de Administración Tributaria do dereito a que se refire o punto 1 deste artigo.

O órgano competente da comunidade autónoma comunicarlle a identidade dos suxeitos pasivos que aplicaran a bonificación ó Departamento de Xestión Tributaria da Axencia Estatal de Administración Tributaria, que, pola súa vez, lle comunicará a aquel as resolucións que se adopten nos procedementos a que se refire o punto 1 deste artigo en relación cos ditos suxeitos pasivos.

3. O recoñecemento previo do dereito dos suxeitos pasivos do imposto sobre actividades económicas á bonificación prevista no dito imposto será efectuado, logo de solicitude do interesado, polo concello do municipio que corresponda ou, se é o caso, pola entidade que teña asumida a xestión tributaria do imposto, a través do procedemento previsto no artigo 9 do Real decreto 243/1995, do 17 de febreiro, polo que se dictan normas para a xestión do imposto sobre actividades económicas e se regula a delegación de competencias en materia de xestión censual do dito imposto.

A solicitude do citado recoñecemento previo deberáselle xuntar certificación expedida polo consorcio ou polo órgano administrativo correspondente que acredite que as actividades de carácter artístico, cultural, científico ou deportivo que deban ter lugar durante a celebración do respectivo acontecemento se enmarcan nos seus plans e programas de actividades.

4. Para a aplicación das bonificacións previstas noutros impostos e taxas locais, os suxeitos pasivos deberán presentar unha solicitude ante a entidade que teña asumida a xestión dos respectivos tributos, á que lle uniran a certificación acreditativa do cumprimento do requisito esixido no punto 4 do artigo 8 deste regulamento, expedida polo consorcio ou polo órgano administrativo correspondente.

5. O prazo máximo en que debe notificarse a resolución expresa do órgano competente nos procedementos previstos nos puntos 3 e 4 deste artigo será de dous meses desde a data en que a solicitude tivese entrada no rexistro do órgano competente para resolver. O cómputo do dito prazo suspenderase cando sexa requirido o interesado para que complete a documentación presentada, polo tempo que medie entre a notificación do requirimento e a presentación da documentación requirida.

Transcorrido o prazo a que se refire o parágrafo anterior sen que o interesado recibise notificación administrativa acerca da súa solicitude, entenderase outorgado o recoñecemento previo.

6. O órgano que, segundo o establecido nos puntos anteriores, sexa competente para o recoñecemento do beneficio fiscal, poderalle requirir ó consorcio ou órgano administrativo correspondente, ou ó solicitante, a achega da documentación a que se refire o punto 1 do artigo 10 deste regulamento, co fin de comproba-la concorrencia dos requisitos esixidos para a aplicación do beneficio fiscal do que se solicita o recoñecemento.

Artigo 10. *Certificacións do consorcio ou do órgano administrativo correspondente.*

1. Para a obtención das certificacións a que se refire este capítulo, os interesados deberán presentar unha solicitude ante o consorcio ou o órgano administrativo correspondente, á que lle xuntarán a documentación relativa ás características e á finalidade do investimento realizado ou da actividade que se proxecta, así como o orzamento, forma e prazos para a súa realización.

O prazo para a presentación das solicitudes de expedición de certificacións rematará 15 días despois da finalización do acontecemento respectivo.

2. O consorcio ou o órgano administrativo correspondente emitirá, se procede, as certificacións solicitadas segundo o establecido no punto anterior, nas que se fará constar, polo menos, o seguinte:

a) Nome e apelidos, ou denominación social, e número de identificación fiscal do solicitante.

b) Domicilio fiscal.

c) Descrición do investimento, gasto ou actividade, e importe total do investimento realizado.

d) Confirmación de que a actividade se enmarca ou o investimento se realizou en cumprimento dos plans e programas de actividades do consorcio ou do órgano administrativo correspondente para a celebración do acontecemento respectivo.

e) No caso de obras de rehabilitación de edificios e outras construcións, a confirmación expresa de que as obras se realizaron en cumprimento das normas arquitectónicas e urbanísticas que, ó respecto, poidan establecelo concello respectivo e o consorcio ou o órgano administrativo correspondente.

f) No caso de gastos de propaganda e publicidade, cualificación de esencial ou non do contido do soporte para efectos do cálculo da base de deducción.

g) No caso da certificación a que se refire o artigo 9.2 deste regulamento, o compromiso do solicitante de que os bens e dereitos adquiridos se destinarán, directa e exclusivamente, á realización de investimentos efectuados en cumprimento dos plans e programas de actividades do acontecemento respectivo.

h) Mención do precepto legal en que se establecen os incentivos fiscais para os investimentos ou actividades a que se refire a certificación.

3. O prazo máximo en que deben notificarse as certificacións a que se refire este artigo será de dous meses desde a data en que a correspondente solicitude tivese entrada no rexistro do órgano competente para resolver.

Se no dito prazo non se tiver recibido requirimento ou notificación administrativa sobre a solicitude, entenderase cumprido o requisito a que se refire este artigo, podendo o interesado solicitarlle á Administración tributaria o recoñecemento do beneficio fiscal, segundo o disposto no artigo anterior, achegando copia selada da solicitude.

Artigo 11. *Remisión das certificacións expedidas polo consorcio ou o órgano administrativo.*

O consorcio ou o órgano administrativo correspondente remitiralle ó Departamento de Xestión Tributaria

da Axencia Estatal de Administración Tributaria, nos meses de xaneiro, abril, xullo e outubro, copia das certificacións emitidas no trimestre anterior conforme o previsto neste regulamento, para a súa ulterior remisión ós correspondentes órganos de xestión.

Se o consorcio ou o órgano administrativo correspondente non tiver emitido a certificación solicitada segundo o establecido no artigo anterior, deberá remitir copia da solicitude presentada polo interesado.

Artigo 12. *Aplicación do réxime de mecenado prioritario.*

1. Para efectos do disposto no punto segundo do artigo 27.3 da Lei 49/2002, as entidades ou institucións beneficiarias do mecenado prioritario deberán obter a correspondente certificación do consorcio ou órgano administrativo correspondente segundo o disposto no artigo 10 deste regulamento, na que se certifique que a actividade realizada se enmarca dentro dos plans e programas aprobados polo dito consorcio ou órgano administrativo correspondente.

2. As entidades e institucións a que se refire o punto anterior expedirán, en favor dos achegadores, as certificacións xustificativas previstas no artigo 24 da Lei 49/2002 e remitiranlle ó consorcio ou ó órgano administrativo correspondente, dentro dos dous meses seguintes á finalización de cada exercicio, unha relación das actividades financiadas con cargo ás ditas achegas, así como copia das certificacións expedidas.

3. O consorcio ou o órgano administrativo correspondente remitiralle copia das certificacións recibidas, dentro dos dous meses seguintes á súa recepción, ó Departamento de Xestión Tributaria da Axencia Estatal de Administración Tributaria.

Disposición adicional única. *A Igrexa católica e outras igrexas, confesións e comunidades relixiosas: aplicación do réxime fiscal especial e acreditación para efectos da exclusión da obriga de reter ou ingresar á conta.*

1. As entidades a que se refire o punto 1 da disposición adicional novena da Lei 49/2002 que decidan aplica-lo réxime fiscal especial previsto nos artigos 5 a 15 da dita lei non terán que efectuar as comunicacións reguladas nos artigos 1 e 2 deste regulamento. O dito réxime fiscal será aplicado directamente polo suxeito pasivo cando se trate de tributos obxecto de declaración ou autoliquidación, e pola Administración tributaria nos demais casos.

A acreditación destas entidades para efectos da exclusión da obriga de reter ou ingresar á conta a que se refire o artigo 12 da Lei 49/2002 efectuarase mediante certificado expedido, por petición da entidade interesada e con vixencia indefinida, polo órgano competente da Axencia Estatal de Administración Tributaria, no que se acredite que a entidade está incluída no punto 1 da citada disposición adicional. Na solicitude deberase acreditar a personalidade e natureza da entidade mediante a certificación da súa inscrición emitida polo Rexistro de Entidades Relixiosas do Ministerio de Xustiza.

2. As entidades a que se refiren a disposición adicional oitava e o punto 2 da disposición adicional novena da Lei 49/2002 seralles de aplicación o disposto nos artigos 1, 2 e 4 deste regulamento para efectos do exercicio da opción polo réxime fiscal especial e da acreditación do dereito á exclusión da obriga de reter ou ingresar á conta.

Disposición transitoria única. *Opción polo réxime fiscal especial para determinados períodos impositivos.*

O réxime fiscal especial establecido na Lei 49/2002 seralles aplicable ós períodos impositivos iniciados a par-

tir do 25 de decembro de 2002 que finalizasen antes da entrada en vigor deste regulamento, sempre que as entidades sen fins lucrativos se acollan ó dito réxime, de acordo co establecido no seu artigo 1, dentro dos tres meses seguintes á entrada en vigor deste regulamento.

MINISTERIO DE SANIDADE E CONSUMO

19572 *REAL DECRETO 1277/2003, do 10 de outubro, polo que se establecen as bases xerais sobre autorización de centros, servicios e establecementos sanitarios. («BOE» 254, do 23-10-2003.)*

A Lei 16/2003, do 28 de maio, de cohesión e calidade do Sistema Nacional de Saúde, no seu artigo 27.3 establece que mediante real decreto se determinarán, con carácter básico, as garantías mínimas de seguraza e calidade que, acordadas no seo do Consello Interterritorial do Sistema Nacional de Saúde, deberán ser esixidas para a regulación e autorización por parte das comunidades autónomas da apertura e posta en funcionamento no seu respectivo ámbito territorial dos centros, servicios e establecementos sanitarios. No seu artigo 26.2 dispón que o Rexistro xeral de centros, establecementos e servicios sanitarios do Ministerio de Sanidade e Consumo será de carácter público e permitiralles ós usuarios coñecer-los centros, establecementos e servicios, de calquera titularidade, autorizados polas comunidades autónomas.

Así mesmo, a Lei 14/1986, do 25 de abril, xeral de sanidade, no seu artigo 29.1 establece que os centros e establecementos sanitarios, calquera que sexa o seu nivel, categoría ou titular precisarán autorización administrativa previa para a súa instalación e funcionamento, así como para as modificacións que respecto da súa estrutura e réxime inicial se poidan establecer. O artigo 29.2 determina que a previa autorización administrativa se referirá tamén ás operacións de cualificación, acreditación e rexistro do establecemento e que as bases xerais sobre cualificación, rexistro e autorización serán establecidas por real decreto. No artigo 40.9 da citada lei prevese a existencia dun catálogo e rexistro xeral de centros, servicios e establecementos sanitarios no que se recollerán as decisións, comunicacións e autorizacións das comunidades autónomas, de acordo coas súas competencias.

A finalidade deste real decreto é regula-las bases do procedemento de autorización de centros, servicios e establecementos sanitarios, establecer unha clasificación, denominación e definición común para todos eles, e crear un rexistro e un catálogo xeral dos ditos centros, servicios e establecementos, de conformidade co disposto nos artigos 29.1 e 2 e 40.9 da Lei 14/1986, do 25 de abril, xeral de sanidade, e no artigo 26.2 da Lei 16/2003, do 28 de maio, de cohesión e calidade do Sistema Nacional de Saúde.

A clasificación, as denominacións e as definicións contidas nesta disposición constitúen os criterios xerais para proceder posteriormente, en desenvolvemento do artigo 27.3 da mencionada Lei 16/2003, á determinación, con carácter básico, das garantías mínimas e comúns de seguraza e calidade que deberán esixilas comunidades autónomas para autoriza-la apertura e a posta en funcionamento dos centros, servicios e establecementos sanitarios.

Non é propósito deste real decreto ordena-las profesións sanitarias, nin limita-las actividades dos profesionais, senón senta-las bases para as garantías de seguraza e calidade da atención sanitaria.

No procedemento de elaboración desta disposición xeral emitiron informe as organizacións profesionais sanitarias, o Consello de Consumidores e Usuarios e o Consello Interterritorial do Sistema Nacional de Saúde.

Na súa virtude, por proposta da ministra de Sanidade e Consumo, coa aprobación previa da ministra de Administracións Públicas, de acordo co Consello de Estado e logo de deliberación do Consello de Ministros na súa reunión do 10 de outubro de 2003,

DISPÕÑO:

Artigo 1. *Obxecto e ámbito de aplicación.*

1. Este real decreto ten por obxecto:

a) Regula-las bases xerais do procedemento de autorización de centros, servicios e establecementos sanitarios polas comunidades autónomas.

b) Establecer unha clasificación, denominación e definición común para tódolos centros, servicios e establecementos sanitarios, públicos e privados, imprescindible para a creación dun rexistro xeral.

c) Establece-lo catálogo e o rexistro xeral de centros, servicios e establecementos sanitarios.

2. As disposicións deste real decreto aplicaranse a tódolos centros, servicios e establecementos sanitarios, públicos e privados, de calquera clase e natureza.

3. As disposicións deste real decreto non serán de aplicación, e regularanse pola súa normativa específica, a:

a) Os establecementos dedicados á distribución, importación ou elaboración de medicamentos ou produtos sanitarios.

b) Os servicios e as unidades técnicas de protección radiolóxica.

4. As disposicións deste real decreto serán de aplicación sen prexuízo das funcións e competencias profesionais que para o exercicio das profesións sanitarias e a realización das actividades profesionais correspondentes veñan establecidas pola normativa vixente.

Artigo 2. *Definicións.*

1. Para os efectos deste real decreto, enténdese por:

a) Centro sanitario: conxunto organizado de medios técnicos e instalacións no que profesionais capacitados, pola súa titulación oficial ou habilitación profesional, realizan basicamente actividades sanitarias co fin de mellora-la saúde das persoas. Os centros sanitarios poden estar integrados por un ou varios servicios sanitarios, que constitúen a súa oferta asistencial.

b) Servicio sanitario: unidade asistencial, con organización diferenciada, dotada dos recursos técnicos e dos profesionais capacitados, pola súa titulación oficial ou habilitación profesional, para realizar actividades sanitarias específicas. Pode estar integrado nunha organización cunha actividade principal que pode non ser sanitaria.

c) Establecemento sanitario: conxunto organizado de medios técnicos e instalacións no que profesionais capacitados, pola súa titulación oficial ou habilitación profesional, realizan basicamente actividades sanitarias de dispensación de medicamentos ou de adaptación individual de produtos sanitarios.

d) Actividade sanitaria: conxunto de accións de promoción, prevención, diagnóstico, tratamento ou rehabi-